

SAN PABLO KARTA E'SU FXI'JNI TIMOTEO JÏI

Pablo' Timoteo's fxi'jni

¹ Adxa' Jesukristo jxkaahnisa Pablo yaaseth. Txãasa Dxus kaahnisath, txã'wẽ Kristo Jesusa's jxpa'gate', txã' ïtxi fxi'zewa'ja's ũswa'jsa' jïna pta'sxkahn. ² Adx nçxi'k na'wẽsa Timoteo idxa's fxi'jaçthu, Dxus kwe'sx Tata vxite' kwe'sxtxi jxpe'jsa Jesukristo txãawe'sx peeygãhçxa pu'çxte', idxa' ewçxáa wët fxi'zene'ga.

Jesukristo' nwe'wesa' jïna pta'sxwa'ja's thaa-menu

³ Kus ma'k yuu en ma'k yuu nawa bagaçxtewa Dxus yakh puutx we'we iisath idxa's yajkxna Dxusa's weçxá', adx ũuste kïh pkal yuhwa ji'phmée txã'sçxáanath selpi' adx yaçgawe'sx ma'wẽne'ta selpi' txã'wẽy. ⁴ Idx pxthaa ũ'nena neeyũuni's wala yaaki'th, txãasath idx yakh puutx uywaça' iiméh wala weçxawa'ja's ji'phu'nja'w sũju'. ⁵ Idxa' Dxusa's ũusuh jxukag yaaki' txã'sa' jiith, nyafxiaa' iidx neepex Loida vxite' iidx mama Eunice txãawe'sxtxi txã'wẽ yaakxwa'ja's ji'phu', nawa açxha' txã'wẽ yaakxwa'ja's idxwa ji'phne'ga sũju'th.

⁶ Txãa pa'gath idxa's yu'kxpeje' na'wẽ adx idxa's peekizeçxa Dxus yakh puutx we'wete', Dxusa' ũsku idx kïhtewa sxiigmée fxi'zewa'ja's, aça' txãatxi' jweeíçxáa peçxkanamée pa'pçxuna mfxi'ze. ⁷ Dxusa' kwe'sx ũukhna fxi'zewa'ja's

ũsme', wejxwa ũukhmée çxhãçxha yajkxna peeygãhna peekí ew fxi'zewaj txã'wěsatxku ũs. ⁸ Txãa pa'ga thaamena ũukhnu kwe'sxtxi jxpe'jsa Jesukristo' nwe'wesa yuja' jĩna pta'sxwa'ja's, sa' Jesukristo's selpiipa'ga adx preesu ũsthu txãa pa'gawa thaamenu. Dvus yuwe ewte nvxiitwa'jsa's pta'sxpa'ga nxuswa'j en pa'thewa txã'sa' yajkxmée, Dvusa' adxa's kçxhãaçxha'jana sũhnaçxáa mes. ⁹ Dvusa' kwe'sxtxi nwe'weçxa txhitxku, txajx dxi'pte kĩh pkal yuhwa ji'phmée fxi'zekahn. Nawa txajx dxi'pte kwe'sx ew yũupa'ga txã'wě txhitxme', naasáa txajx jxthãasni' txã'wěk yu' naa pa'gaçxáak kwe'sxtxi' peeygãhçxa txhitxh, txã'wě Kristo Jesus yakh utxaapa'ga. Naa kiwe meetey Dvusa' kwe'sxtxi peeygãjk. ¹⁰ Nawa txajx peeygãani' kwe'sxtxi nwe'wesa Jesukristo kĩinjũk isa ãate vxyaa. Txajuk Jesukristo' uuwa'ja's knayçxa ki' itxi yuuwa'ja's vxit, sa' ãate kaajiyu'kh bagaçxte yuhwa pçumée itxi fxi'zewa'ja's. Txã'wě yũuni'sku Kristo yuwe ewte nvxiitwa'jsa' pta'sxi'.

¹¹ Aça' txãa Kristo yuwe's pta'sxkahnku adxa's Dvusa' nvxiht, judiu ji'jmée vxite nasatxwa kaapiya'khan. ¹² Txãa pa'gath txakwe wala thēyte fxi'ze'. Nawa thaame'çmeeth, txãa pa'gatey jiith kim txã'wě adx yakh pu'çxna ũstewa, sa' ew jiith Kristo tasxte ũswa'j en ãhpkaçx txã' adx neewe'weni's kxtey yuuna nes yuuna.

¹³ Aça' idxa' adx ma'wětka ew kaapiya'j txã'wěçxáa mfxi'ze, sa' Dvusa's ũususuh jxuka yajkxna peeygãawa'ja'swa ũuste ji'phgu Kristo

Jesus yakh fxi'zepa'ga txãatxi's peçxkanamée mfxi'ze. ¹⁴ Idxna Dxus neewe'weçxa nvxiitni's wala ew mpa'yajkx peçxkanamée, açã' Dxus Espiritu kwe'sx ũuste ũssa' pu'çxhina.

¹⁵ Idxa' jiiyã'jne'ga, Asia kiwesuwe'sx jxukaysa adxa's thegmée nvxihttxi, vxite' Fxigelo Hermógenes txãawe'sxwa txuteetx. ¹⁶ Txã'wētewa Onesífxoro yu' maz uswa adxa's kvxiisxa'kh adx preesu ũstewa thaamemée. Txãa pa'ga Křisto' Onesífxorowe'sxtxi' nwe'wena. ¹⁷ Txãasaík txã' Romate ũsçxa', adxa's uypkaçx pakwena pa'j. ¹⁸ Txã'wē ew yūupa'ga Křisto tasxna u'jwa'j en āhte', Dxusa' deweena. Idxa' ew jiig txã' kwe'sxtxi wala pu'çxsa' Efxesote.

2

Idxa' soldau ew nwēese'jsa na'wē myuu

¹ Adx nçxi'k na'wēsa idxa' Křisto Jesus pu'çxni's jxpa'gaçxa Dxus yakh çxhãçxa mfxi'ze. ² Nasa maazkuēesa ksxavxyte adx ma'wēne'tka pta'sx txãa pta'sxni'síiçxáa mkaapiya'j Dxus yakh ew fxi'zesatx, kxah txãawe'sxwa vxitetx txã'wēyçxáa kaapiya'jatxna.

³ Idxa' Jesukřistoçxá's nwēese'jsa yã'jçxa', nxuswa'j en thēysa pa'thewa txãatxi' ũukhmée çxhãçxa myajkx. ⁴ Soldauwa ma'wēga vxitesu yu' nwēese'jmée soldau npiiçthē'j jxkaahniçxá's nwēese'je' txã'wēy myūu. ⁵ Txã'wēy knayya' pweesa'sawa ma'wē jxkaathe' kxtey nwēese'jna pa'pçxumeeçxa yu', kīh yuhwa knaymeena.

6 Mj̄isawa nyafxte' mj̄iwa'ja's khuẽ'y çxhãçxa mj̄iwa'j ji'pha' uuthasx thẽ'the' ũ'wa'j uyya'.
 7 Adx we'wenitxi's jiyuya' ũus myajkx, açã' Jesukristo' kaajiyu'juna jxuka.

8 Açxha' Jesukristo' jxkaahsa Davxid ji'j uuçxawa ki' itxi yuuk txã'sna myajkx. Adxa' txã'snath pta'sxi' ewte nvxiitwa'jsa' j̄ina.

9 Txã'wẽ Kristo yuwe ewsa's pta'sxpa'ga yuuçxãa preesu ũsthu yuuwesa na'wẽ tudni pxthaa yuuna. Nawa Dxus yuwe yu's tud-ya' ãjameetxna. 10 Txã'wẽ Dxus yuwe's yup-ya' ãjawa'jme' açiçxãath adx nxuswa'ja's ũukhmée Dxus yuwe's pta'sxi' Dxus txhitxnisa nwe'wewa'j ũstxna txãawe'sxtxi peeygãhçxa, kxah Kristo Jesus yakh utxaapa'ga txãawe'sxwa ji'phutxna pçuwa'jmée weçxana ewte ũswa'ja's.

11 Na'wẽ yũuwa'ja's pta'sxnisa' īsxiinisame':
 Kristo's ũuste jxpa'gaçxa uuçxa', txãa na'wẽy itxi fxi'ze'nja'w.

12 Makwe nxuste fxi'zewa'ja's ji'phuçxawa, cielute txãa yakh jxkaahwa'j yu'sa' ivxiitume'nja'w.

Txã'wẽ yũumée wa'luwá'nja'w açã' txãawa kwe'sxtxi' jxpa'gameena.

13 Meeçxa' kwe'sxa' txãa yakh kxtey yuumeewá'nja'w, nawa txã' txajx puutx we'weni's kxtey yuuna nes yuuna.

Txãa pa'gatey Dxusa' txajx puutx we'weni's īsxiiwa'jsame'.

Kĩhte yuhwa sxiigmée fxi'zewa'jçxã's pa'pçxuni

14 Yakhthē'jwe'sxtxi yu'kxpehni's mkaayaki'j Dxus dxi'pte, kxah selpiwa'jmeesu we'weniçxá's ũusçxa pasna fxi'zemeetxna. Txã'wēsa' selpiçme', naasáa wēse'jsatx kaypuba'jsaçxá'.
 15 Dxus dxi'pte kīhte yuhwa sxiigmée wala ew fxi'zewa'jçxá's mpa'pçxu, Dxus yuwe's jxpubamée pta'sxna, mj̄isawa ma'wēga ew mj̄içxa' thaame'çmée txã'wēy myūu.
 16 Selpiwa'jmeesuçxáa we'wena kaapiya'jnitx mpa'yajkx. Txã'wēme' txã'wē kaapiya'jsa' jweeíçxáatx een isa jxpubana ewmeete wetena u'jwe'.
 17 Naapkaçxha' txãawe'sx kaapiya'jni yu' jweeíçxáa mteewa jxuka suwna u'jwena. Himeneo vxite' Fxiletowe'sxa' txã'wē yūusatx yu'.
 18 Txãasatx isa pta'sxnijū yu' jxpubaçxa uusaawe'sx itxi yuuwa'j ena' skhēwyã'kh jīna kaypuba'jna ũsta' Dxus yakh fxi'zesatx maaítxi's.
 19 Nawa maaçxah txãa jīitewa ew jiyukahn Dxusíi na'jīna we'weçxak nvxiht: Dxusa' jīia' maaçxah txãa jīitewa jī'k. Sa': Jxukaysa Dxus yakh fxi'zesa' ewmeejū jxuka txutewa'jsata' jī'k.

20 Miiyajkx: Teeçx yatte' iijxūnisa vxyuu beh vxyuu çxihme txã'wē ewsaçxáa ũsmeeta'. Kxteea' açxamée selpisáa fxtūu, kiwe mitx-hwa ũsta'. Nawa iijxūni ewsa' ewsaçxá's selpiwa'jsa', aça' açxamée ewsa' ewmeesuçxáa selpiwa'jsata'.
 21 Txã'wē Dxus kusete ew selpi wēeçxa', ewmeejū jxuka txuteeçxa bagaçxte yuhwa pkalte wetemée Dxus yakh yuuçxáa fxi'zewa'ja'. Txã'wē yuuçxáa selpiiya' ya'ājana kīhtewa ew yūuwa'ja's.

22 Idxa' piçtakxwe'sx ewmée yajkxna fxi'zenijũ txuteeçxa kĩhte yuhwa jxpubamée ewçxáa mfxi'ze, Dxusçxáana yajkxna, maa yakhwa ewçxáa fxi'zena peeygãhna Dxusa's ũusuh jxuka neewe'wesawe'sx yakh utxaaçxa. 23 Yuwe kĩhtewa selpiwa'jmeesatxi' nwēese'jnu, yuwe txã'wēsaxi' jiiyã'jg puiiwa'jçxáak kaseje'. 24 Txãa pa'gatey Dxusa's selpisá' puiisu fxi'zewa'jme', wejxwa jxukaysa yakh ewçxáa yũuna fxi'zewa'ja'. Sa' ew kaapiya'jsa yuuwa'ja', ewmée nuywe'wenitx yajkxmée. 25 Txã'wē ũusuh jxuka peeygãhna açesatx yu'kxpehwa'ja', Dxusa' txãawe'sx ewmée yaakxnitx yu'pthehçxa ewsa's kaajiyu'jwaça' sũhna. 26 Kxah eçxthē'j kusete fxi'zeni's jiyuçxa', txãajũ iyuya' ājatxna. Txã'wēme' eçxthē'ja' ma'wēwa suwya' ũsa'.

3

Nmeh en yuuçte' na'wē yũusáa nasa kase-jetxna

1 Nmeh en yuuçte', en ewmeesa ũukhũukhsa pa'jana açá' txã'wē yũuwa'ja's jii mfxi'ze. 2 Nasa' peekx wēt fxi'zewa'jçxá's pa'pçxuçxa', vxite yuutxi' açesa, vxyuuçxá's wejx yaakxsa, iivejçx we'wena fxi'zesa, Dxusa's açewe'wesa, neywe'sxtxi nwēese'jmée, ew yũutewa ka'tu yu' weçxasamée, Dxusa's yuhwa nwēese'jya' yaakxsamée, 3 vxitetx peeygãawa'j yu'sa' ji'phmeesa, ewmée nuywe'wesa, peekx kakweju ewmée yũu wēeniçxá's thaakwe yaakxsa, kĩhwa ewsa yu'sa' jxuka ahçeçxa seena' pkuusáa, 4 āate yu' ew we'weçxawa e'sga yu' kiikhe'jna

fxi'zesa, yuwe ewmée kasehwa'jsuçxáa we'wena fxi'zesa, ew ũus yajkxmey kîhwa yũusáa, iıwejçx yaakxwa'jçxá's ji'phsa, Dxusna pakwepkaçxte naa kiwete wēt fxi'zeniçxá's pakwesáa, ⁵ Dxusa's yaakxsa na'wē yuh yuuna fxi'zetxna, nawa isa ũuste yu' Dxusa's ji'phmée yuutxna. Nasa txã'wēsax mpa'yajkx. ⁶ Txã'wēme' txãawe'sxa' maaıı yu' yat-su pa'jçxa İxiijatxna u'y ew fxi'zewa'j yu'sa' ji'phmeesa pkalteçxáa fxi'zesatx. Txãa u'ya' kîh yũu wēeni'swa jxuka jiyu wēenite ⁷ kaapiya'jni's jxpa'gaçxawa, isa ewsa yu'sa' jiyuya' āja'çmeeta', pkalteçxáa fxi'zepa'ga. ⁸ Ma'wēta dxijxuusáa e'zsa Janes Jabres txãawe'sxwa Moisesa's ahçe, txã'wēy txãa piçthē'jwe'sxa' isasa yu'sa' açetxna. Txãa pa'gatey txãawe'sx ũus yaakxni' jxuka suwenia', Dxus yakh fxi'zewa'j yu'sa' ji'phmeeta' naa pa'ga. ⁹ Nawa txãa piçthē'jwe'sxa' jwee yu' kîhwa yũuya' ājameetxna, txãawe'sxa' kîhwa jiimeesate jiyuyã'jçxa', nasa' jxukaysa jwee yu' nwēese'jmeetxna naa pa'ga, ma'wēta e'zsa Moisesa's açesawa kîhwa yũuya' ājamée txã'wēy.

Pablo' Timoteo's nmeh neewe'weçxa nvxiitni

¹⁰ Nawa idx yu' adx kaapiya'jnitx jxpubamée ũsgu. Idxa' jiiğ adx ew fxi'zeni, Dxusçxá's selpiya' yaakxni, Dxusa's peçxkanamée yaakxni, makwe thēysa vxyaatewa txãatxi' yajkxmée fxi'zeni, peeygãhnaçxáa fxi'zeni, ma'wētka maa sũhmée wantāyi' txakwe ahçeçxa pkuuuni yuuçxawa. ¹¹ Idxa' peekx jiiğ Antiokía, İkonio, Listra çxhabsu adxna pkuuuna açenitxi'. Nawa

Dxusa' txãasu jxuka nwe'wek. ¹² Aça' maawa Kristo Jesusa's selpiiya' utxasa' pkuuni yuutxna. ¹³ Naapkaçxha' ewmeesa ãsxiisa' jweeíçxáa ewmée yũuna u'jwetxna, aça' ya'ãsxiisa' jweeju vxitetxwa ãsxiina u'jwetxna.

¹⁴ Nawa idx yu' iidx piyanijũ weh yuhwa txutemée mfxi'ze, txãa pa'gatey wala ew jiiig idxa's kim kaapiya'thewa. ¹⁵ Le'çxkuëjũjx Dxus yuwe's jiyug txã' Kristo Jesus yakh fxi'zeçxa ewte pa'jwa'ja's kaajiyu'juna. ¹⁶ Txãa pa'gatey Dxus libru' jxuka Dxus kaaũusuthe'jnisaçxaçxáata', txãasa seelpisata' ewmée yũukahmén yu'kxpejxa', jxpubamée ewçxáa kaafxi'ze'jya'. ¹⁷ Kxah Dxus yakh fxi'zesa' kíhtewa sxiigmée piyaçxa ewçxáa yũuna fxi'zetxna.

4

¹ Kwe'sxtxi jxpe'jsa Jesukristo jxkaahsa yuuçxa yuhna ãtxisatx vxite' uusaatx pkhakhçxa kíh yũusatewa we'weya' txajx dxi'pte vxite' Dxus dxi'pte wala ew neewe'weçthu ² Dxus yuwe's pta'sxwa'ja's. Bagaçxtewa pta'sxna nes myuu. Pta'sxwa'j en yu'sa' ivxiitunu, kaajiyu'jna, ewmée yũukahmén we'wena, yu'kxpehna. Bagaçxtewa wa'lmée mkaapiya'j. ³ Txã'wēme', en ājana, aça' txājũyã'ja' nasa' jxpa'gaya' wa'lutxna Dxus yuwe ewsa's makwe pta'sxtewa. Naasáa txãawe'sx ũus pēyni's kaapiya'jwa'jsaçxáa maazkuēewa pakweetxna. ⁴ Isa kaapiya'jni yu'sa' e'skhē nvxihtçxa, kíhwa naa kiwete kwentu'jniçxá's nwēese'jetxna. ⁵ Nawa idxa' jxpubamée fxi'zewa'ja's mpa'yajkx, nxussa pa'thewa çxhãçxha mfxi'ze. Sa' Dxus yuwe's

pta'sxwa'the yuuçxáa mfxi'ze, iidx mjïia's weh yuhwa nvxiitnu. ⁶ Txã'wēme', adxa' ãçxha' ikhwa'jçxáa yã'j ũsthu, adx uu ena' utxa ũsa'. ⁷ Nawa adxa' ewmeesa yakh puiiwa'ja's adx yuh knaythu, Dxus neewe'weni adx pta'sxwa'ja's jxuka kxtey yuuth, sa' Dxusa's yaakxwa'ja's le'çxkwe yuhwa ivxiitumeeth. ⁸ Txã'wē Dxus dxi'pte ew selpiina fxi'zepa'ga peeswa'j cielute jxaawni ũsa' txã' adxa's ũythasna ũsa'. Txã'sa' kwe'sxtxi jxpe'jsa khuēs ewsa txajx kïiwa'j en ãhte, adxa's ũsuna. Sa' adxçxáana ũsmeena; txajx kïiwa'j ena's weçxana ũythasna ũssa yuutxi' jxukaysatx ũsuna.

Timoteo's Pablo yuu kaahni

⁹ Ma'wētewa en kutxi'jçxa dud myuh adxa's thegya'. ¹⁰ Txã'wēme', Demasa' adxa's thegmée u'kh Tesalónikan, txã' naa kiwetewe'sxçxá'sku wejx wedxi' txãasak txã'wē yūu. Krescente' Galacia kiwenku u'j, naapkaçxha' Tito' Dalma-cia kiwenku u'j. ¹¹ Aça' Lukas yuuçxáa adx yakh ũsa'. Markosa's pakweçxa pe'jçxa myuh, ayte adxa's mjïi pu'çxkahn. ¹² Tíkiko's Efxeso çxhabnath kaah. ¹³ Idxa' yuhçxa', adx atxh Troas çxhabte Karpo yatte nvxihtthu txã'sa' jxūçxa yuweene'ga. Sa' librutx vxite' fxi'jni eçtxi wejx peçxkanamée jxūne'ga.

¹⁴ Çam tuça Alejandro' adxa's wala ewmée yūuk. Nawa txã'wē yūupa'ga txã'sa' Dxus jiina. ¹⁵ Idxa' mpa'yajkx txãa piçthē'ja's. Txã'wēme', txã' wala açesa yuuk kwe'sx pta'sxni's.

¹⁶ Adxa' nyafxçxah adx ma'wēsaçxawa khuēswe'sx tasxna pasya' u'the', kim yuhwa adx

ju'gu yuumeeta', adxçxáanatx nvxiht. Txã'wě yūutewa, txãawe'sxtxi' Dxusa' peltunāywaça' sūju'th. ¹⁷ Makwe txã'wě yūutewa, Dxusa' adxa's pu'çxku nxuskahmén, kxahth Kristo yuwe ewte nvxiit-sa's pta'sxya' ājaçxa judiu jìjmée vxite nasa maazkuēesatxwa kwēese'jya' āja. Dxusa' txã'wěk adxa's nwe'we león yuweju. ¹⁸ Sa' txã'wěçxaçxáa ewmeejū jxuka nwe'weçxa jxaawuuna cielute txajx jxkaahna ūsnitewe'sx. Wala yuh weçxa yuja' txã'wě ew yūupa'ga.

Pablo yuwe weçxaa kaahni

¹⁹ Āçxha' yuwe meen weçxa Priska vxite' Akila vxite' Onesifxorowe'sxtxi. ²⁰ Erasto' Korintote neeyūuk, aça' Trofximo's Miletoteth nvxiht āça'k txãa pa'ga. ²¹ Nus pa'jwa'j en āhmeyna yujxa' mpa'pçxu. Idxa's yuwe weçxaa kaja'tx Eubulo vxite' Pudente vxite' Lino vxite' Klaudia vxite' yakhthē'jwe'sx jxukaysa.

²² Kwe'sxtxi jxpe'jsa Jesukristo' idx yakh nes yuuna, aça' Dxusa' i'kwe'sx jxukaysatx pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

06da09f4-8d0f-5001-ae8c-0e6aa0131ffd